





apt





1565

LES

13. 2. 17.

DOVZE REI-
GLES, DV SEIGNEVR
Iean Pic de la Mirandole: lesquel-
les adressent l'homme au combat
spirituel, pour s'acheminer à la
vertu, & resister aux tentations
du monde.

*Traduites de Latin en Francois, par Mon-
sieur M. Jean de Coras, Docteur es droicts, &
Conseiller du Roy, au Parlement de Tolose.*



ALRON.
PAR ANTOINE VINCENT.

M. D. LXV.

Avec priuilege du Roy.

THE NEWBERRY
LIBRARY

A I E ANNE DE CORAS
ma fille.

B I E N que les forces de nature, (ma fille) vous puissent, & doyuent suffisammēt inciter à vous souuenir de moy, durāt ces deux mois de mon voyage: ay-ie neantmoins voulu, comme par un memorial vous laisser ce petit œuvre (que i ay rendu pour vostre instruction, de Latin en Francois) contenant les douze enseignemens, qu'une personne telle que vous, à qui l'aage ne peut encore auoir apporté grande doctrine, ou experience, doit diligemmēt apprendre, & engrauer soigneusement dans son cœur, pour s'en seruir d'armes, & de defense, en temps & lieu contre les tentations du monde. Lequel œuvre ie vous donne, à la charge d'y ietter les yeux si souuent, qu'il demeure perpetuellement empreint en vostre memoire. En quoy ie cognoistray, (ma fille) quelle affection vous auez à seruir, & honorer Dieu, à suyure la vertu, & à obeir à vostre pere, qui le vous cōmande: & prie Iesus Christ, dresser en tout vos intentions. de Tolose, ce 18. Septembre 1559.

LES



LES DOVZE REIGLES,

de Iean Pic de la Mirandole: Les-
quelles adressent, & incitēt l'hō-
me au combat spirituel, pour s'a-
cheminer à la vertu, & resister aux
tentations du monde.

Premiere Reigle.



IL A voye de vertu, semble à
l'hōme dure, ou par trop mal-
aisée, par ce qu'il luy cōuiēt ba-
tailler continuellement contre
la chair, le diable, & le monde:

Il se doit souuenir aussi, que le chemin de vo-
lupté est plus fascheux & penible. Et par ain-
si, que quelle voye que l'hōme sache choisir
& eslire, encore selon le mōde, il luy faut sans
doute souffrir beaucoup de choses plus as-
pres, contraires, & incommodes.

I I.

L'homme doit ramenteuoir aussi, qu'aux
affaires du monde, on pratique & cōbat, non
seulement avec plus grād' peine: mais encore
plus longuemēt, & sans profit aucun, ausquel-
les le trauail est fin de trauail, la peine. fin de

M.iii.

peine. & la recompense finale, vn tourment
eternel.

III.

Dauantage faut que l'homme se reduise
en memoire, estre vne trop grand folie, de
croire qu'on puisse paruenir au ciel, & en l'e-
ternelle beatitude, si ce n'est par ce cōbat: cō-

a j. Corin. xj.

Ephesiens v.

Colofsiens j.

b Luc xxiiij.

c Marc viij.

Luc xxiiij.

d Iean xij.

& xv.

me aussi Iesus Christ nostre chef^a, ne voulut
point mōter aux cieux que par la croix^b. Car
il falloit (dir l'Escripture) qu'il souffrist beau-
coup de choses, qu'il fust reprouuē des ancīes,
& mis à mort, & ainsi entraist en sa gloire^c. Or
le seruiteur n'est point plus grand, ni de meil-
leure cōdition, que son seigneur & maistre^d.

IIII.

En outre ne faut prendre à regret. ce com-
bat. ains plustost le desirer, quand bien nous
n'en deuions rapporter autre loyer, ou guer-
don, que d'obeir au cōmandemēt du seigneur
Dieu, & nous cōformer à la volonté de Iesus
Christ son fils. Et toutes fois & quantes, resi-
stant à quelque tentation, tu fais violence à
l'vn de tes sens, il te conuient penser, à quelle
partie de la croix tu te cōformes. comme par
exemple: lors que resistant à la gourmandise,
tu affliges ton goust, souuiēne-toy que Iesus
Christ tō sauueur fut abreuuē sur la croix, de
fiel & de vinaigre^e. Et quand tu retireras ta
main de prendre quelque chose d'autrui, qui
toutesfois te plaist, & t'agree: considere aussi,
les mains de Iesus Christ auoir esté fichees,
& estendues

e Mat. xxvij.

Marc xv.

Luc xxij.

Iean xix.

& estendues pour toy sur l'arbre de la croix.
 & si tu resistes à orgueil, souuienne-toy, que
 Iesus Christ ton redempteur estant en forme
 de Dieu, s'est humilié soy-mesmes, & aneanti
 pour toy, prenant forme d'un seruiteur, & a
 esté obeïssant, iusques à la mort, voire à la mort
 de la croix^a. Et quād par quelque tētatiō tu es a Philip. ij.
 esmeu à ire & courroux, tu dois rememorer,
 que Iesus Christ estant Dieu, & de tous les
 hommes le plus iuste, s'est veu prins, & mené
 comme vn larrōn, outragé de toutes especes
 d'opprobres: iusques à luy cracher au visage,
 flagellé, couronné d'espines poignantes, nauré
 en toutes les parties de son precieux corps: &
 en fin crucifié au milieu de deux brigans, re-
 puté avec les iniques^b. Toutesfois ne monstra^b Marc xv,
 il oncques le moindre signe de courroux, ou
 d'indignation. ains au contraire souffroit tou-
 tes choses patiemment, & respondoit à tous,
 avec grande douleur, & mansuetude^c. c Luc xxij,
 Marc xv.

Ainsi discourant par le menu ces choses, tu
 trouueras, qu'il n'y a passiō, ni tormēt, lequel
 patiemment souffert, & enduré, nē te donne
 consolatiō, te rendāt en quelque partie sem-
 blable & conforme à Iesus Christ, Sauueur de
 tout le monde.

V.

Il est tres-necessaire rememorer aussi, qu'il
 ne conuient pas s'endormir, ne fier en ceste
 patience, ou en autre quelconques humain re-
 mede. Mais s'appuyer seulement aux merites

de la passion & incomprehensible vertu de Iesus Christ, qui dit à ses disciples, Vous endurez des afflictions au mode: mais fiez-vous en moy, & ayez bon courage. car j'ay vaincu le monde^a. & ailleurs, Mainténât le prince de ce mode sera ietté dehors. & moy, si ie suis esleué de la terre, (c'est à dire pendu pour mourir en croix) ie tireray tout à moy-mesme^b. Demâdons dôcques son aide, par cōtinuelle oraison: & ayons fiâce, & colloquôs toute nostre esperâce en la seule vertu de Iesus Christ. par laquelle nous-nous pouuôs asseurer de vaincre le monde, & surmonter nostre aduersaire le diable.

a Iean xvij.

b Iean xij.

V. I.

L'homme n'aura pas vaincue vne tétation, que soudain l'autre ne se presente. parce que Satan commun ennemi des hômes, nous environne iour & nuict, cōme vn lion bruyât à l'entour, cerchât quelqu'un pour le deuorer^c. Par ainsi faut, que l'hôme pense luy resister, veillant en oraison fort & ferme en la foy. & dire avec le Prophete, Je me tiendray sur ma garde, & me colloqu eray sur la forteresse, espiant pour voir, qu'e st ce qu'on me dira, & ce que ie doy respondre^d.

c j. de S. Pierre v.

d Abacuc. ij.

V I I.

Il faut encore que l'hôme rasche nō seulement de n'estre point vaincu de son aduersaire Satan, quand il le tète: mais encore de vaincre ce cruel ennemi. c'est à dire, nō seulement n'obeir

beir, ni t'abandonner à la tétation qu'il te presente: mais encore faire tō profit de la chose d'où il t'auoit tété, & de laquelle il te pensoit attirer à soy. cōme par exēple: S'il te presentoit quelque tienne œuvre bonne à fin de te faire enorgueillir, & tresbucher en la fosse de vaine gloire, il te faut promptement reietter de toy ceste bōne œuvre, ne l'aduouant, ni recognoissant pour tiēne, & l'attribuer au seul Dieu, duquel toute bonne chose procede^a. & a Iaques j
pēser avec Dauid, Que tous les hōmes declinent, & sont faits abominables deuāt Dieu. desquels n'en y a pas vn seul qui face biē^b Et b Pseau. liiij
par ainsi, que ceste bōne œuvre que le diable pour te circonuenir te presente cōme tienne, n'est d'autre q̄ de Dieu, lequel en t'humiliāt, tu dois humblemēt remercier, de ce qu'il luy a pleu te despartir ses benefices.

V I I I.

Quand tu cōbas contre le diable, faut que ce soit à telle intention, que tu gaigneras à ce coup sur luy la victoire, & par là vne paix perpetuelle: esperant q̄ le bon Dieu te fera ceste grace, que le diable surmonté de toy, & cōfus de ta victoire, ne reuiēdra plus desormais par tentation t'assaillir. Toutesfois quād tu auras vaincu, il te faut neāt moins tenir sur ta garde, cōme si derechef, & biē tost tu deuois rétrier au cōbat cōtre luy. de manière que au cōbat, tu sois tousiours souuenāt de la victoire. & de mesmes en la victoire, te souuenāt du cōbat.

I X.

Bien que par la grace de Dieu, tu te sentes bien muni & fortifié de toutes pars, pour résister à l'ennemi, ne dois-tu pourtant moins fuir, pour cela, les occasions de pecher. Car comme le sage a laissé escrit, Celuy qui aime le pe-

^a Ecclesiasti- que iij.

X.

Il est de besoin d'obuier du commencement, tant qu'il est possible, aux tentations, & froiser les enfans de Babylon à la pierre ^b. c'est à dire, à Iesus Christ, qui est la vraye pierre ^c, sur laquelle est bastie l'Eglise chrestienne ^d. Car quand la maladie est auancee, & a trainé longuement sur la personne, la medecine le plus souuent vient trop tard.

^b Pseaume.

^c xxxviij.

^d j. Corin. x.

Matth. xvj.

X I.

Iasoit qu'au conflit de la rétatation, le combat semble estre dur, & fort amer. Toutesfois de vaincre la tentation, est vne chose sans comparaison plus douce, plaisante, & agreable, que de suyure le peché, auquel la tentation nous appelle incline. En quoy certes plusieurs sont grandement deceus, qui ne parangonnent point la douleur de la victoire, au plaisir du peché. Mais au rebours, accomparet le combat, à l'affection desordonnee de la volupté: & toutesfois l'homme, q a mille fois experimenté qu'est ce que donner lieu, & s'abandonner à la tentation, deueroit essayer vne fois pour le moins, qu'est-ce que vaincre la tentation.

XII.

XII.

Par ce que tu es souuētésfois tēté, ne pense point estre quitte, ni delaisſé de Dieu, ou bien luy estre peu agreable. Mais ſois records que ſainct Paul, apres auoir veu l'eſſence diuine, ſouffroit la tentation de la chair, par laquelle Dieu permettoit qu'il fuſt tenté, à fin qu'il ne ſ'enorgueillist. Je voy (diſoit-il) vne loy en mes mēbres, bataillant contre la loy de mon ame, & me rendāt captif à la loy de peché, qui est en mes membres^a. En quoy faut bien que l'homme ſoit aduiſé: d'autant que ſainct Paul vaiſſeau eſſeu pour teſmoigner le nom du ſeigneur deuant les Gentils, & les Rois^b: ayant eſté rai iuſques au tiers ciel^c: eſtoit-il neantmoins en danger s'enorgueillir de ſes vertus: cōme en quelque lieu il eſcriuoit de ſoy-mesmes: à fin (dit-il) que ie ne fuſſe eſſeué outre meſure par la grandeur & excellence des reuelations, il m'a eſté dōné vnaiguillon en la chair, & l'ange de ſatan, qui me ſouffletaſt^d.

^a Rom.vij.^b Actes ix.^c ij. Cor.xij.^d ij. Cor.xij.

Sur toutes les tentations dōcques le chreſtien ſe doit aſſortir & fortifier contre la tentation d'orgueil, & de vaine gloire: parce que la racine de tous maux eſt ſuperbe, vice hay deuāt Dieu & les hōmes^e: & qui dès le commencement, a ſur tous les autres deſpleu au ſeigneur Dieu^f, qui touſiours leur reſiſte, & dōne grace aux humbles^g. & pour faire fin, chacun de nous doit remettre en memoire le ſouuerain remede contre l'orgueil, eſtre de

^e Eccleſiaſti-

que x.

^f Iudith .ij.^g j. Pierre.v.

^a Philipi. ij.

penfer q̄ Iefus Chrift s'eft humilié pour nous iufques à la croix^a. Et que la mort nous humiliera iufques à faire de nostre corps, viande & mägeaille des vers de terre. Car quād l'homme mourra (dir le Sage, & avec luy le Prophe^{te}) il aura pour heritage, ferpens, beftes, & vers^b.

^b Efaye xiiij.
Ecclefiaftique
x.

*S E N S V Y V E N T L E S
douze considerations, & armes spirituelles, que
l'homme doit auoir tousiours presentes en son
efprit, quand il est tenté de quelque affection
desordonnee, qui l'aiguillonne & qui le presse. ti-
re du meſme autheur.*

Premiere.

Que la volupté est vn bien petit plaisir, &
qui ne dure gueres.

I I.

Que la volupté est tousiours accōpagnée
de fouci, falcherie, chagrin, & angoiſſe.

I I I.

Que la volupté est la perte d'un bien infi-
niement grand.

I I I I.

Que nostre vie est vn ſommeil, ou pluſtoſt
vne ombre: c'est à dire, vne apparence ſeule-
ment de viure. Car la vraye vie est en la mort
des bons.

V.

Que la mort est fort prochaine, venant
tousiours à l'impourueu

VI.

V I.

Qu'il est à craindre, que volupté ne nous endurcisse, & conduise à impenitence: nous abyfinant aux vains plaisirs de ce mode. Tellemét que n'ayons apres ni pouuoir, ni vouloir de nous repentir.

V I I.

Que l'eternelle felicité est proposee aux bons, & la peine eternelle preparee aux mauuais.

V I I I.

Que la dignité & nature de l'homme, est la plus noble de toutes les creatures. voire si excelléte, que nos corps sont appelez membres de Iesus Christ. Lesquels à ceste cause, doyuent estre par nous soigneusement gardez de toute pollutió, & souillure, & l'esprit d'estre prophané^a, ou cõtaminé d'aucune folle concupiscence. a j. Cor. vj.

I X.

Que celuy qui resiste aux tentations, a paix en son esprit, & repos en sa cõscience, se sentant reconcilié avec Dieu: ou il est autrement en continuelle peine, & inquietude.

X.

Que les benefices de Dieu enuers nous sont singuliers, & grãs: desquels abuser, seroit se separer volontairement de son createur, & tomber à son escient en vice d'inexcusable ingratitude.

X I.

Que si aucun veut suyure Iesus Christ, faut

qu'il renonce soy-mesmes, & porte sa croix. voire qu'il perde la vie pour l'amour de luy: attendant apres inestimable recompense. Car qui perdra sa vie pour moy, (dit-il) & pour l'Euangile, il la sauuera^a.

^a Mat. xvj.
Marc viij.

XII.

Pour la fin conuient, que l'homme se propose continuellement la vie des Apôstres, les tesmoignages des martyrs, & exemples des saincts.

LES DOVZE CONDITIONS, du vray amour que le Chrestien doit auoir en aimant son Dieu, de toutes ses forces: comme il luy est commandé.

Premier.

Aimer vn seulement, & contemner les autres, & toutes choses pour luy.

II.

Estimer malheureux, tous ceux qui ne l'aiment, & ne sont avecques luy.

III.

Souffrir toutes les aduersitez du monde. voire la mort, pour estre avecques luy.

IIII.

S'armer des accoustremes qu'on iugera luy estre agreables pour luy plaire.

V.

Estre avecques luy, côme que ce soit, pour le moins de pensee, s'il ne peut de faict.

VI.

Non seulement l'aimer, mais encores toutes

tes

tes choses qui luy appartiennent.

V I I.

Desirer sa grandeur, sa gloire, ses louanges, & ne pouuoir endurer qu'on detracte de luy en maniere quelconques.

V I I I.

Croire de luy toutes choses grâdes, & desirer que les autres facent ainsi.

I X.

Souhaiter encores d'endurer pour luy quel que fascherie, & ennuy: ou souffrir quelque dommage. & neantmoins trouuer telles peines & pertes douces.

X.

Pleurer avec luy souuent d'ennuy, & de douleur, en son absence: de plaisir & de ioye, en sa presence.

X I.

Languir incessammēt, & brusler tousiours d'estre avecques luy.

X I I.

Le seruir de tout son cueur, de grande affection, sans attendre loyer ni recompense. A quoy nous sommes induits, singulieremēt pour trois raisons. La premiere, quand le seruice de soy-mesmes, est desirable. La secōde, quand celuy que nous seruons, est en soy fort bon, & aimable: tout ainsi que communemēt on dit, Nous seruons vn tel homme, pour ses vertus. La troisieme, quand celuy-la que tu sers, deuant que tu commençasses le seruir, t'auoit fait de grans biens. Et ces trois choses

font abondammēt, & avec toute plénitude, en Dieu. D'autant qu'en le seruant, nous receuons toutes choses bonnes & salutaires, & pour l'ame & pour le corps. Car seruir à luy, n'est autre chose que tascher & pretendre à luy. C'est à dire au souuerain bien. Pareillement il est tresbō, tresbeau, & tressaige, ayāt toutes les conditions qui nous peuuent induire à aimer quelqu'un, & le seruir gratuitement. Et en outre il nous a donné des biens excellens, singuliers & souuerains, nous ayāt faits, & creez de neāt. Et apres d'enfans d'ire & de malediction, faits enfans de Dieu: rachetez d'enfer, & de la main de Satan, par le precieux sang de son fils Iesus Christ.

F I N.

A raison cede.

